

上海书店印行

第三卷·陈乃乾辑

清名家詞

曝書亭詞

三種



曝書亭詞

秀水朱彝尊錫鬯

江湖載酒集

霜天曉角 早秋放鶴洲池上作

青桐垂乳。容易凝珠露。一縷金風飄落。添幾點、豆花雨。簾戶翦燈語。草蟲飛不去。坐愛水亭香氣。是藕葉、最多處。

高陽臺 并序

吳江葉元禮。少日過流虹橋。有女子在樓上。見而慕之。竟至病死。氣方絕。適元禮復過其門。女之母以女臨終之言告葉。葉入哭。女目始瞑。友人爲作傳。余記以詞。橋影流虹。湖光映雪。翠簾不卷春深。一寸橫波。斷腸人在樓陰。游絲不繫羊車住。倩何人、傳語青禽。最難禁。倚徧雕闌。夢徧羅衾。重來已是朝雲散。恨明珠佩冷。紫玉煙沈。前度桃花。依然開滿江潯。鍾情怕到相思路。盼長隄、草盡紅心。動愁吟。碧落黃

泉兩處誰尋。

柳梢青 和沈山子西湖後游之作

障羞羅扇。花時猶記。者邊曾見。曲彙闌干。玲瓏窗戶。也都尋徧。兩峯依舊青青。但不比、眉梢平遠。第一難忘。重來崔護。去年人面。

清平樂 秋夜宿燈公山房

秋林風絳。鍾乳霜初降。應有愁猿來聽講。吠犬寥寥深巷。明星無數茅檐。披衣轉覺寒添。不是山中無酒。何妨一醉陶潛。

憶王孫

黃蘆紅蓼白蘋洲。一水東西南北流。舊日秋娘尙在不。石橋頭。柳外斜陽花外樓。

又 夜泛濫湖

天邊新月兩頭纖。鏡裏晴山萬點尖。小櫂烏篷不用簾。夜厭厭。漸覺微風衣上添。

生查子

雙眉澹遠山。一髻簪寒玉。鉛粉幾曾施。最好新妝束。江月去茫茫。不照春船宿。空有酒如泉。難聽琵琶曲。

醉太平 題姜開先贈歌者李郎秦樓月詞

支郎眼黃。何郎粉香。尊前一曲迴腸。愛秦樓月涼。公羊穀梁。鄱陽括蒼。詞人試數。諸姜算堯章擅場。

女冠子

鶯篋軟語。小店槐陰無暑。索寒漿。一笑千金值。雙蛾半額長。愛他黃竹子。織就女兒箱。那得銀釭下。卷衣裳。

望湘人

愛蘭風兩岸。梅月半牆。浣紗溪上曾住。步障教移。燭花漸熄。依約斜窺簾戶。虎僕毫尖。麝丸墨淡。倩題詩句。記恁時。卓女含情。比我相如詞賦。愁思孤帆朝暮。奈雙魚消息。未傳幽素。到香徑重尋。祇有碧桃千樹。晚蘇撲柳。晴絲卷燕。儘自飛來飛去。渾

不見人面重門。虛憶畫中眉嫵。

思越人

小門關深徑轉。昔年曾醉秦樓。笑撚畫裙青案底。教擡纖手藏鉤。臨行指我相尋路。鏡湖一曲西去。繞遍湖塘烏桕樹。知他門掩何處。

探春令

萼萼夜火。那年屋角。伴人驚走。對銀灣、脈脈含情久。不道是、相逢驟。露華如雨凝高柳。滴單衣涼透。到歸來、始悔輕分手。已許我、攜羅袖。

桂殿秋

思往事。渡江干。青蛾低映越山看。共眠一舸聽秋雨。小簾輕衾各自寒。

更漏子 吳江秋泛

橈頭船。菱葉港。十里冷楓門巷。江八測。柳千條。赤闌第四橋。煮鱸香。聽鴨語。莫恨舟師催去。空翠淡。夕陽孤。飛帆度石湖。

采桑子 梧宮詠古

何年越客千絲網。網住西施。看殺吳兒。貯館娃宮得幾時。離筵白紵歌纔罷。拋了西施。遠去黃池。冷笑夫夫真個癡。

滿江紅 金山寺

巨石孤根。作弄出、寒潮鳴咽。映焦山遠樹。蒜山晴雪。水晶中冷誰載取。鐘聲兩岸何曾歇。試層層、路轉妙高臺。簾齊揭。哀笛響。風鳴葉。樓船靜。沙沈鐵。望揚州一片。海雲明滅。浪裏江豚空自舞。天邊塞鴈飛相接。把題詩、張祐問山僧。猶能說。

又 吳大帝廟

玉座苔衣。拜遺像、紫髯如乍。想當日、周郎陸弟。一時聲價。乞食肯從張子布。舉杯但屬甘興霸。看尋常、談笑敵曹劉。分區夏。南北限。長江跨。樓櫓動。降旗許。歎六朝割據。後來誰亞。原廟尚存龍虎地。春秋未輟雞豚社。剩山園、衰草女牆空。寒潮打。

風蝶令 石城懷古

青蓋三杯酒。黃旗一片帆。空餘神識斷碑錢。借問橫江、鐵鎖是誰監。花雨高臺冷。胭脂辱井絨。夕陽留與蔣山街。猶戀風香、閣畔舊松杉。

賣花聲 雨花臺

衰柳白門灣。潮打城還。小長干接大長干。歌板酒旗零落盡。剩有漁竿。秋草六朝寒。花雨空壇。更無人處一憑闌。燕子斜陽來又去。如此江山。

喝火令

豆蔻熏香匣。檳榔潤小脣。蘭斜插暈妝新。輸與金錢多少。看取浣紗人。無意曾窺宋。多愁易感甄。畫樓蠻蠟射南鄰。那不當窗。那不卷簾頻。那不收燈時候。月底踏芳塵。

菩薩蠻 東筦書所見

佛桑花謝蕉心重。牆陰浪蹙沙文擁。何處采珠還。素馨添雨鬢。生香藏肘後。瑣細兼紅豆。一唱摸魚聲。都來月下聽。

東坡引

纖羅輕似葛。遙山橫似抹。樽前祇見銀河闊。何人花底活。
雲鬢愁禪。玉釵休拔。更纖手、檀槽撥。月斜聽到歌聲滑。六幺花十八。六幺花十八。

酹相思 阻風湖口

社鼓神鴉天外樹。見渺沙、江流去。向晚來、石尤君莫渡。大姑也、留人住。小姑也、留人住。杜宇催歸朝復暮。轉把歸期誤。儘燈火、孤篷愁幾許。風急也、聲聲雨。風定也、聲聲雨。

好事近 效朱希真漁父詞

新月下瓜洲。重露漸成涓滴。船尾漁燈紅逗。映蕭蕭蘆荻。偶然鼓枻度金山。夜久梵鐘寂。一縷潮痕催送。報隔江風笛。

洞仙歌 吳江曉發

澄湖淡月。響漁榔無數。一雲通波撥柔櫓。過垂虹亭畔。語鴨橋邊。離根綻、點點牽牛

花吐。紅樓思此際。謝女檀郎。幾處殘燈在窗戶。隨分且敲眠。枕上吳歌。聲未了、夢輕重作。去聲也。儘勝。鞭絲亂山中。聽風鐸郎當馬頭衝霧。

有有令 計甫草索贈吳僮時來

樽前須記。記取小名兒。時來方見你。年便周三五。看秀靨。依然媚。是天生。付與騷人。苦吟不足。添他憔悴。南北相攜萬里。且緩作。五湖歸計。鎮日賸裁藤角。洗硯收龍尾。鈔詩更會人意。問伊故里。可有个、延年女弟。

南樓令

春水到門長。春蕪繞徑香。好花枝、未隔東牆。來往花陰仙犬熟。已無意、吠劉郎。舊事費迴腸。支機片石旁。便金梭、投也何妨。暗悔當時真個錯。無一語、但形相。

明月引

小紅樓上有紅妝。是蕭娘。是韋娘。聞說他家。慣自畫眉長。扇又遠遮簾。又下。暗塵起。紫騮嘶。向夕陽。夕陽夕陽斷人腸。柳半塘。花半牆。數也數也。數不盡。塘上鴛鴦偏。

我相思，人到獨眠牀。若這個人偷嫁我，拚南漿，打春潮，送故鄉。

蝶戀花

碧浪湖寬天水接。郭外晴嵐，佛髻三雲疊。纔見黃花開穩貼。一般也有悠揚蝶。何處飛來江上楫。妹是桃根，姊定名桃葉。賦就閒情添口業。研羅卻羨湘裙褶。

玉樓春

舊游聽說臨邛路。壇畔燒春誇卓女。不同新寡更風流。斷續巫山朝暮雨。遙峯眉樣應如故。只有琴心難寄與。從前翻恨是相逢。剛道勝常看又去。

殢人嬌 贈女郎細細

絕小脣朱，無多眉翠。算舞腰、楚宮有幾。犀心一線，柳條通體。比燕燕蟲蟲，也還纖媚。易露簾前，最宜懷裏。借片石、迷藏花底。一分難減，千絲得繫。待社日歸來，與伊相對。

似嬌兒

鏡約總難諧。十年事、雨絕雲乖。苧蘿未嫁西施日、蘭橈曾並、畫樓曾共、香徑曾偕。明白逗春懷。纖纖步、引上重階。小屏風對鴛鴦浴、無言半晌、替他整髻、翻溜金釵。

玉抱肚

橋頭官渡。沙頭煙樹。放歸船、碧浪湖中。短篷同聽疏雨。恨參差朔鴈。何苦又、慘澹江天。叫秋暮。城隅漸近。隱隱梵鼓。臨當去、重分付。少別經年。相逢地、單衫佇立。知誰畫眉嫵。好春兒、過了都無緒。好夢兒、作去聲成都無據。限仙源、百尺紅牆。翠禽小小不度。斷魂難訴。從今憶、舊事淒涼尙堪賦。但只怕你、朱顏在、也非故。水又遙、山又阻。便成都染就、箋十樣、也寫不盡相思苦。

梅花引 蘇小小墓

小溪澄。小橋橫。小小墳前松柏聲。碧雲停。碧雲停。凝想往時、香車油壁輕。溪流飛偏紅襟鳥。橋頭生偏紅心草。雨初晴。雨初晴。寒食落花、青驄不忍行。

沙塞子

白頭無賴到西泠。浮小艇、愛問南屏。依舊是、風荷十里、浴烏沙汀。酒徒一半已凋零。重過處、酒幔猶青。有多少、酒罇舊事、訴與誰聽。

惜分釵

雲鬢膩。眉峯細。小脣秀。鬢天然媚。比紅兒更風姿。一捻何人得似腰支。師師。李波妹。桃根姊。橫波微露千金意。玉交卮。乍同持。漏鼓無聲。未是歸時。遲遲。

百字令 富春道中

柁樓侵曉。望樟亭木末。霧收川淨。誰把錢塘犀弩射。衝落驚濤千頃。霸業孫郎。高風嚴子。畢竟論誰勝。西臺寂寞。更何人掃巖磴。最愛躑躅花繁。畫眉啼處。高下穿紅影。十載重來頭已白。愁對清江如鏡。沙際鷗鷺。門前烏柏。引我移家與眾。師漁父。結鄰儘許相並。

秋霽 嚴子陵釣臺

七里灘光。見擁樹歸雲。石壁銜照。漁火猶存。羊裘未敝。只合此中垂釣。客星曾老。算

來無過煙波好。況有个、偕隱市門。仙女定娟妙。當此更想、去國參軍。白楊悲風、應化朱鳥。翠微深、鷓鴣飛處。半林茅屋掩秋草。歷歷柁樓人影小。水遠山遠。君看滿眼江山。幾人流涕。把莓苔掃。

祝英臺近 任城登李太白烟樓

女牆低。官柳暮。俯首眺齊魯。冷綴苔錢。斷碣眠方礎。最憐酒釀花濃。好春閒度。更誰解。金魚換取。啓塵戶。遙見十里帆檣。催人動津鼓。翠杓多情。容我醉方去。待他明月高時。臨風歌處。也未許。此翁千古。

百字令 度居庸關

崇墉積翠。望關門一線。似懸檐溜。瘦馬登登愁徑滑。何況新霜時候。畫鼓無聲。朱旗卷盡。惟剩蕭蕭柳。薄寒漸甚。征袍明日添又。誰放十萬黃巾。九泥不閉。直入車箱口。十二園陵風雨暗。響徧哀鴻離獸。舊事驚心。長塗望眼。寂寞閒亭堠。當年鎖鑰。董龍真是雞狗。

又 爲曹使君題江南春思圖

平林縹緲望江南。春色依依堪戀。
二水三山愁未了。猶有參差宮殿。
十四樓空。斜陽細柳。繫馬誰家院。
傷心王謝。舊來惟剩雙燕。最憶一曲秦淮。
浮橋斷板。卷飛花如霰。目極寒雲千萬里。
吹起驚沙人面。記取扁舟。挂帆歸去。
料得長相見。新愁幾許。六朝芳草吟徧。

菩薩蠻 登雲中清朔樓

夕陽一半樽前落。月明又上闌干角。
邊馬盡歸心。鄉思深不深。
小樓家萬里。也有愁人倚。望斷尺書傳。
雁飛秋滿天。

柳梢青 應州客感

金鳳城偏。沙攢細草。柳擘晴絲。
九十春來。連宵鴈底。幾日花前。
禁他塞北風煙。虛想像。湖南扣舷。
夢裏頻歸。愁邊易醉。不似當年。

多麗 送王懷仁謫官西安經歷

滿長亭。落葉西風殘日。綰青絲、勸斟別酒。一杯知其何夕。且踟躕、路歧執手。莫愁他、急管橫笛。五斗猶分。雙鳧自在。此行千里。更須努力。到廳事、藥囊丹竈。清晝甚閒適。爭誇道、參軍未老。幕府長揖。有高捧、金人露掌。削成玉女峯色。好清秋、樂游原上。遠勝沙南戰雲黑。北斗秦城。西京漢苑。登樓王粲。幾殊昔。灞橋外、也應尋徧。風雪定相憶。看來歲、芳樹隴頭。寄我消息。

上行杯

朝雨渭城歌罷。柳煙深。杏花開乍。細草無邊青滿野。又早夕陽西下。南浦送君樹玉。駐馬。珍重意。莫辭把。

清平樂 馬邑道中

客何爲者。日日風塵惹。燕子春來秋又社。萬事不如歸也。家書字字行行。秋深只道還鄉。不信行人更遠。黃沙白草茫茫。

采桑子 雲州書感

去年一丈天山雪。凍鵲枝頭。暢好春游。到得春來祇是愁。炎風匹馬黃塵裏。又盼清秋。涼月南樓。到得秋來總是愁。

消息 度雁門關

千里重關。憑誰踏徧。雁銜蘆處。亂水淖沱。層霄冰雪。鳥道連勾注。畫角吹愁。黃沙拂面。猶有行人來去。問長塗。斜陽瘦馬。又穿入離亭樹。猿臂將軍。鴉兒節度。說盡英雄難據。竊國真王。論功醉尉。世事都如許。有限春衣。無多山店。醺酒徒成虛語。垂楊老。東風不管。雨絲煙絮。

滿庭芳 李晉王墓下作

獨眼龍飛。鴉兒軍至。百戰真是英雄。沙陀去後。席卷定河東。多少義兒子。將千人敵。一一論功。爭誇道。生來亞子。信不愧而翁。前驅囊矢日。三垂岡上。置酒臨風。歎綠衣天下。回首成空。冷落珠襦散盡。殘碑斷。不辨魚蟲。西林外。哀湍斜照。法鼓影堂中。花發沁園春。王湛求方伯。招同惲含萬姚。注若周雪。客諸子。飲郝園。